



Siverth K. Heilmann  
Atassut

UPA 2023/79  
19. april 2023

**Pisortanit aqunneqartumik cannabissip inerteqqutaajunnaartinneqarneratigut hashimik eqqussuisarnerup, eqqusseriaraluarnermi toqusoqartarnerata, hashimik unioqqutitsilluni tuniniaasarnerup tigungmiaqartarnerullu kiisalu aningaasanik Kalaallit Nunaannit annissuisarnerup akiorneqarsinnaanerat pillugu apeqquteqaat aallaavigalugu oqallinnissamik siunnersuut.**

(Inatsisartunut ilaasortaq Aqqalu C. Jerimiassen, Atassut)

Aqqalu C. Jerimiassen qujaffigerusuppakkit sapiissuseqarlutit nunatsinni siornatigut oqallisigineqarsimanngitsumik saqqummiussaqaaravit. Erserpormi saqqummiunniariarit oqallinneq annertooq pilersinneqarmat, ajornartorsiutillu allatut qaangerniarneqarsinnaanissaanik apeqquteqarlutit aqqtussiuigavit. Oqallinnermi saqqummerniariartoq partiit allat akorluapallakkaat malunnarpoq, tamannalu nuannaarutissatut tiguarput.

Ukiorparujussuarni ikiaroorartumik akiuiniarneq annertuumik pisimavoq. Uangalumi aamma politiiuninni aamma tamakku annertuumik aqqusaartarsimavakka, ukiorpassuarnilu politikikkut akiuiniarnermi oqallinnerni akuusarsimallunga. Politiiusimaninni, ukiorpassuarnilu politikkeriusimaninni pinerluttunngorsaanikkut, pinaveersaartitsineq aningaasaliisarnikkut, inatsisinik sukaterinikkut, katsorsaanissamut aningaasaliisarnikkut suliaqut annertusimaqaat.

Ullumikkullu killiffigisarput ersarippoq. Suli ajornartorsiut annertuvoq. Meerannguillu eqqugaajuarnerat suli annernarpoq. Siunnersuuteqartullu ammasumik apeqqutigisaa tassa allatut iliuuseqartoqarsinnaanersoq, Atassummiit soqutiginaateqartut tiguarput. Soqutiginarluinnarporlu nunani allani ammaassimanikkut misilittakkat paasilluassallugit. Misilittagaasummi pitsaasumik inerneqarluarsimanngippata tamatta akuersaaginnarnaviarunanngilaput. Takusinnaavarpummi nunarsuatsinni ammaassinerit amerliartortut, allaallumi ikiaroorartut sakkortuutut nunat tamalaaniit naatsorsorneqarunnaarsimalluni.

Atassummiillu isumaqarpugut taamaallaat ajornartorsiutip takussutissartaa aaqqiiviginiarneqartariaqanngitsaq. Inuit peqquteqarlutik imigassamik ikiaroorartumillu ajornartorsiuteqarput. Misigissutsiniimmi annernartuniit imigassaq ikiaroorartorlu qimaaffiusarput. Nassuertariaqarpugulli, ukiorparujussuarni politikikkut namminiilivinniarnarujussuatsinni innuttaasut katassimavagut. Politikikkullu aappillaarissumik qulaaniit aqutsinerujussuup, neriorsuiluttornerujussuullu innuttaasut kiffaannngissusiarsimallutigit.

Anngiortumik eqqussuisoqartarunnaassappat, pinerluttunngortitsiunnaassappat, aningaasarparujussuillu miliuunikkaat akileraarutitaqanngitsut nunatsinniit aniajunnaassappata inuit qaqugumorsuaq inertertuarsinnaagaluarpagut, takulaartiguli allamik aaqqiissutaasinnaasumik periarfissaqarnersoq toqqaannartumik ingerlaannarlu itigartivinngikkaluarlugu. Qujanarporlu oqallinnerup aallartinneraniit inuit akornanni paasiartorneqalermat cannabis aamma hash assigiinngissuteqarmata.

Tunngavilersuuterpassuit uteqattaarneqareersut uteqqinngikkaluarlugit, soorlumi tamatta isumaqatigiissutigisinnaagipput misilittagaasut paasisaqarfigeriarlugit oqallinneq nangeqqikkumaaripput, innuttaasullu aqquataa tamaat isummersortilluarlugit.

Qujanaq.